

Obraćanje Supervizora za Brčko, Susan R. Johnson, novoizabranim zastupnicima Skupštine Brčko Distrikta

Cijenjeni zastupnici Brčko Distrikta i poštovani gosti

Dozvolite mi, na početku, da kao supervizor, i u ime svih supervizora koji su služili Brčko Distriktu, kažem da se istinski nadam da ću utjecati na vas, izabrane poslanike Brčko Distrikta, ali ne u korist, niti protiv bilo kojeg pojedinca ili stranke, nego samo da apeliram na vas da zauzmete konstruktivan pristup u neposrednom zadatku odabira najbolje moguće Vlade Brčko Distrikta, u ovoj fazi njegove povijesti. To je oduvijek bio naš cilj, a nadam se i vaš.

Obraćam vam se ovdje danas sa ciljem da naglasim povijesni značaj ove konstitutivne sjednice prve izabrane Skupštine Brčko Distrikta i značaj odluka koje ćete donositi i izbora prilikom biranja predsjednika Skupštine i gradonačelnika.

Distrikt se suočava sa izuzetno značajnim trenutkom u svom razvoju. Svojim glasovanjem donosite odluke koje će utjecati na to da li će Brčko Distrikt zadržati svoj poseban, jedinstven status samoupravne jedinice koji je definiran arbitražnim odlukama i Statutom, ili će postati samo još jedan pijun na političkoj šahovskoj tabli Bosne i Hercegovine.

Statut i Izborni zakon Brčko Distrikta predviđaju da 29 zastupnika izabranih od strane građana imaju odgovornost da izaberu najbolje pojedince na najveće rukovodeće pozicije u Distriktu. Vi, pojedinačno i kolektivno, ste tih 29 zastupnika. Vaš izbor će direktno utjecati na budućnost Distrikta – na blagostanje i prosperitet njegovih građana i status i položaj Brčko Distrikta u BiH.

U vašim nastojanjima, apeliram da iznad svega imate na umu i u srcu odredbu članka 26 Statuta Brčko Distrikta:

“Zastupnici se u javnom životu moraju ponašati na primjeren, prikladan i etičan način, te obavljati svoje dužnosti savjesno i isključivo za dobrobit Distrikta i Bosne i Hercegovine.”

Izbor rukovodstva Distrikta je nesumnjivo jedna ako ne i najvažnija dužnost koju vi kao zastupnici imate. Statut vas obvezuje da vršite ovu dužnost sukladno vašoj savjesti i prvenstveno za dobrobit Distrikta...- ne za dobrobit bilo koje političke stranke ili njenog rukovodstva.

Vi ste zastupnici – savjetnici – u pravom smislu te riječi, i vaš zadatak je da među sobom izaberete osobe za koje vjerujete da su najpodobnije da obavljaju funkcije predsjednika Skupštine i gradonačelnika, koji će raditi zajedno sa svima vama na tome da Distrikt vode naprijed, sukladno sa Statutom, arbitražnim odlukama i Ustavom Bosne i Hercegovine.

U donošenju ove odluke, morate imati na umu mnogo faktora osim pripadnosti političkoj stranci i nacionalnosti – karakter, iskustvo, dokazanu sposobnost za obnašanje dužnosti koje ta funkcija zahtijeva, sposobnost da se zadobije povjerenje većine građana, i sposobnost da zastupa sve njihove interese, bez obzira na nacionalnost, vjeroispovijest, pol ili starosnu dob.

Na kraju krajeva, vi ste ti koji snosite krajnju i direktnu odgovornost za izbor rukovodstva Distrikta, bilo da sprovedite ono što vaša stranka predlaže ili donosite sopstvenu neovisnu odluku. Apeliram na političke stranke Brčkog da i one na prvo mjesto stave interese Brčko Distrikta i da podrže politiku koja će Brčkom dati najefikasniju, najtransparentniju, najodgovorniju i najprofesionalniju moguću Vladu.

Britanski feldmaršal Montgomery je rekao: “Sposobnost rukovođenja je sposobnost i volja da okupite muškarce i žene

oko zajedničkog cilja, i osobina kojom se pridobija povjerenje.” Brčkom su danas potrebni lideri koji imaju i sposobnost i volju da okupe muškarce i žene svih nacionalnosti oko zajedničkog cilja – doborobit Distrikta i BiH, i osobinu da pridobiju povjerenje svih segmenata stanovništva, uključujući mlade i stare.

Brčko Distrikta je prešao dug put od završetka rata u svojoj reafirmaciji kao multietničke zajednice u kojoj raste duh tolerancije i uzajamnog poštovanja. Još uvijek mora da stekne istinski demokratske, multietničke institucije koje funkcioniraju efikasno, da završi važnu reformu zakona, obnovi gospodarstvo tako da može zadržati ekonomsku samoodrživost, i izgraditi konstruktivne i odnose koji će biti od uzajamne koristi za Distrikt, državu i entitete.

Ako se očekuje da Brčko napreduje u svakom pogledu, mora biti ujedinjeno oko zajedničkog cilja i vizije. Na vama je da izaberete rukovodstvo koje može, zajedno sa svima vama, definirati zajednički cilj i viziju, i oko toga ujediniti građane Distrikta.

Dozvolite mi da vam čestitam na izboru. I na kraju, kao što bi se reklo u Americi, dozvolite mi da izrazim nadu da će vas bog voditi u donošenju odluka i dati blagoslov ishodu vaših nastojanja.